

昨
非
庵
日
纂

明鄭瑄著

第六冊

進步書
局校印

昨非菴日纂卷之十七

明 鄭瑄輯

方便

路逢險處為人關。一步周行便覺天。空海濶遇到窮時。使我留三分撫恤。自然理順情安。蓋甘苦唯易地周知。而痛癢以設身立見。有能廣開便門。隨見蓮生火宅。纂方便第十七。

宋王均李順之亂。官於蜀者多不挈家。張詠知益州。單騎赴任。官屬憚其嚴峻。莫敢畜婢。公不欲絕人情。遂自買一婢。以待巾櫛。自此官屬稍置姬侍。在蜀四年。被召還闕。呼婢父母出。資嫁之。仍處女也。

任迪簡為天德軍判官。飲酒吏誤以醋供。迪簡以李景畧令酷發之必死。乃強飲之。吐血而歸。軍中人聞皆泣感。

李琮為湖南觀察使。漁者獻巨鯉。琮命家人烹之。腹中得印一面。文曰衡山縣印。琮因索衡山縣近日文書。視其印篆分明似新鑄者。乃召衡山令携印。閱之果新鑄也。琮屏人詰之。令伏罪曰。舊印為人竊去。某與吏竝憂刑戮。乃潛命工人為之。今

唯俟死命也。琮為秘其事。碎新印。令齋舊印歸縣。罕知者。

范文正公淮上遇風。詩云。一棹危於葉。傍觀欲損神。他年在平地。無忽險中人。

肅宗宴於宮中。時有蕃將阿布思伏法。其妻配掖庭。因隸樂工。是日為假宮之長。上及侍宴者笑樂。政和公主獨俛首不視。上問故。公主曰。禁中侍女不少。何必此人。使阿布思真逆人。其妻亦刑人。不合迫至尊之座。果冤邪。豈忍使其妻與羣優雜處。妾深以為不可。上亦憫惻。為之罷戲。

齊貧女徐氏。與鄰婦李氏合燭夜績。徐貧而燭不屢。或謂李曰。徐燭數不屬。請無與夜績。徐曰。妾以貧故。起常先。卧常後。掃室陳席。以待來者。坐常處下。為貧故也。今一室之中。益一人。燭不為益明。去一人。燭不為益暗。何愛東壁餘光。莫之能應。遂復與夜績。

鄭曉為文選時。里中士宦有餽金首飾。承篚以將。而上覆以茗。公直謂茗也。受之。入夫人手。撥茗知之。擊柝語公。公不動聲色。第整理其茗。覆篚如初。出召其人。謂曰。吾初以家適之茗。故拜君惠。頃入內詢家。尚有餘茗。心謝尊意。已授之。令持歸。王元寶每至冬月大雪。合僕夫自本家巷口。掃雪為徑路。躬立巷前。迎揖賓客。就本

家具酒炙宴之為煖寒之會。

梅少司馬衡湘初仕固安令。固安多中貴。狎視令長。稍強項。則與之爭。公平氣以待。有中貴操豚蹄餉公。乞為徵。負公為烹蹄設飲。使召負者前訶之。負者訴以貧。公叱曰。貴人債。敢以貧辭乎。今日必償。徐之。死杖下矣。負者泣而去。中貴意似惻然。公覺之。乃復呼前。蹙額曰。吾固知汝貧甚。然無如何也。亟需而子與而妻。持鋸來。雖然。吾為汝父母。何忍使汝骨肉驟離。姑寬一日。夜歸與妻子訣。此生不得相見矣。負者聞言愈泣。中貴亦泣。辭不願徵。為之破券。

有穿麻服白衣者。道遇吉祥善事。相與牽而避之。勿使相值。其事雖小。其心則厚。楊翥少孤貧。與兄成武昌。為鄉校師。楊文貞公士奇。漂寓武昌。偶憩翥館。以無資告。翥遂讓其塾。自教授他所。日往返十餘里。不厭。隣人作室。簷溜落翥家。人不能平。翥曰。晴多雨少。何必校也。隣人產子。翥恐所乘驢鳴驚之。即嚮驢步。入廟。文貞公落新第。亟邀登堂。曰。舍初成。須得吉人首臨之。

孔鏞為諸生時。家亦貧。饗殮不給。每詣學。則買二餅充饑。五聖閣有道媼。見其旦晚經門。一日迎人問故。公以實告。媼心憐之。謂曰。吾家晝則有齋。夜則有燈。秀才肯

僑居此乎。公從之。遂得肆志於學。後舉進士歸。媼已卒。公斬衰冠送葬焉。

謝公時兵廝逼亡。多近竄南塘。下諸舫中。或欲求一時搜索。謝公不許云。若不容置此輩。何以為京都。

夏翁。江陰巨族。嘗舟行過市橋。一人擔囊傾入其舟。濺及翁衣。其人舊識也。僮輩怒欲毆之。翁曰。此出不知耳。因好語遣之。及歸閱倩籍。此人乃負三十金。無償欲因以求死。翁為之折券。

魏太祖馬鞍懸於庫柱。為鼠嚙。吏懼死。鄧哀王冲以刀故穿單衣。如鼠嚙者。謬為愁色。太祖問之。冲曰。俗以鼠嚙衣為不吉。太祖曰。妄言耳。俄庫吏以嚙鞍聞。太祖笑曰。兒衣在側。而嚙。況鞍懸柱乎。遂不罪之。

吳中饑。范仲淹縱民競渡。日出宴湖上。又召諸寺僧諭之曰。饑歲工賤。可興土木。於是諸寺興工。至倉廩更舍。日役千夫。杭得不饑。凡出遊者。必力足以遊者也。遊者一人。而賴遊以活者。不知幾十人矣。向時吾郡大荒。當事者以歲儉。禁遊船。富家兒率治饌。僧舍為樂。而遊船數百人。皆失業流徙。不能隨時方便者。類如此。

江南計吏止傳舍。及就路。以馬踐草瀉井中。謂不復再過。不久復由此飲。遂為昔時。

莖刺喉而死。後人為戒曰：千里井不瀉莖。

曹彬知徐州，有吏犯罪，立案逾年。杖之人皆不測，曰：吾聞此人新娶婦，若杖之，舅姑必以婦為不利，朝夕呵罵，使不能自存。吾故緩其事，而法亦不赦也。

王去非家居教授，束修有餘，輒分惠於人。比隣有喪，忌東出，西北又皆人居，南則去非家也，乃壞齋室，使之南出。

張忠定公視事退後，有一廳子熟睡。公詰之，汝家有甚事？對曰：母久病，兄為客未歸，訪之果然。公翌日差場務一名給之，且曰：吾廳豈有敢睡者耶？此必心極幽憊，使之然耳。體悉人情至此，誰不願為之死乎？

陸平泉先生勸方便十則云：尋方便在濟貧。饑寒良可憫，推解莫厭頻。尋方便在敬老。光景迫桑榆，居食須安飽。尋方便在息爭。羣小喜相搆，和調仗端人。尋方便在申枉。鑒彼覆盆冤，周旋脫羅網。尋方便在憐才。美哉後來傷，勿惜齒牙推。尋方便在矜愚。昏柔莫輕侮，啟翼須勤渠。尋方便在撫孤。伶仃悵無依，顛危亟相扶。尋方便在撫下。僕役皆人子，百事從寬大。尋方便在掩骸。白骨雖已朽，游魂實堪哀。尋方便在除惡。寧獨忍斯人，惡除良民樂。

去其臣也。必可使復仕。去其妻也。必可使復嫁。

慕容農曰。尊不迫人於險。當人危極之時。其操縱之勢在我。此寬一分。則彼受一分之惠。若抗之。不恕。控之。不已。烏窮則攫。獸窮則搏。反噬之禍。將不可救。

能恭簡公平生清節。一介不取。其巡撫雲南。平蠻公宴之日。乃受金花彩段。或者疑焉。次年公還京。召有司領金花彩段貯庫。始知公不肯以清病人也。不然。當日公不受。誰敢受。此與張乖崖納侍女之事。頗相類。

太尉楊彪與袁術婚。曹操惡之。欲誣以圖廢立。收彪下獄。使滿寵按之。孔融與荀彧囑寵曰。但當受辭。勿加考掠。寵不報。考訊如法。數日見操言曰。楊彪考訊無他辭。此人有名海內。若不明加罪。必大失民望。操於是即日赦彪。初或與融聞寵考掠彪。皆大怒。及因是得出。乃反善寵之曲全。

侯君集等平高昌還。有告薛萬均私通高昌婦人者。命出胡婦付大理。與之辯對。魏徵諫曰。臣聞使臣以禮。今遣大將軍與亡國婦人對辯。帷簿之私。實則所得者輕。虛則所失甚重。昔秦穆公飲盜馬之士。楚莊王赦絕纓之臣。陛下曾二君不逮乎。乃止。羗合兵伐胡。校尉鄧訓擁衛稽胡。令不得戰。議者謂以夷攻夷。縣官收利。不宜禁護。

鄧訓曰不然。自張紆失信。衆羌大動。屯兵二萬。轉運之費。空竭府帑。涼州吏人。命繫絲髮。今因其迫急。以德懷之。庶能為我用。遂令開城。及所居園門。悉驅羣胡妻子。內之。嚴兵守衛。羌無所得。因解去。由是諸胡皆言。鄧使君待我恩信。內我妻子。咸歡喜叩頭曰。唯使君所命。羌胡俗耻病死。每病臨困。輒以刀自刺。訓聞有困疾者。輒拘持縛束。不與兵刃。使醫藥療之。愈者非一。訓病卒。羌胡旦夕臨者數千人。戎俗父母死。耻悲泣。皆騎馬歌呼。至聞訓卒。莫不吼號。或以刀自割。又刺殺其犬馬牛羊。曰。鄧使君已死。我曹亦俱死耳。

龐統性好人倫。勤於長養。每稱述多過其才。人怪問之。統荅曰。當今雅道陵遲。善人少。惡人多。方欲興風俗。長道業。不美其譚。將為善者少矣。拔十失五。猶得其半。而使有志者自勵。不亦可乎。

劫盜張海。將過高郵。知軍晁仲約度不能禦。喻軍中富民出金帛牛酒迎勞之。事聞朝廷大怒。富弼議欲誅約。仲淹曰。兵械足以戰守。遇賊不禦而賂之。法所誅也。今高郵無兵與械。事有可恕。戮之非法意也。且小民之情。得驟出財物而免於殺掠。必喜。仁宗乃釋之。弼有愠色。仲淹密告之曰。祖宗以來。未嘗輕殺臣下。奈何欲輕

啟之。他日手滑。恐吾輩亦未可保也。

杜衍為政。不以威刑督吏。然吏民亦憚其清整。自言歷知州。轉安撫。未嘗壞一官。其間不職者。委以事。使之不暇惰。不慎者。諭以禍福。俾令自新。其有文學政事者。雖不識面。未嘗不力薦於朝。

梁王使人陰刺袁盎。天子使田叔等治梁事。叔至。悉燒梁獄辭。空手來見。帝曰。其事安在。叔曰。上毋以梁事為問也。梁王不伏誅。是漢法不行也。伏法而太后食不甘味。卧不安席。此憂在陛下也。上大然之。使白太后曰。梁王不知為之者。獨幸臣羊勝之屬耳。已伏誅死。梁王無恙也。太后聞之。立起坐餐。氣平復。

高仁厚既破韓求。十三寨卒皆迎降。將士欲焚寨。仁厚止之曰。降人皆未食。先運出資糧。然後焚之。新降者競炊爨。與先降來告者共食之。語笑歌吹。終夜不絕。

曹操舊法。軍征士亡。考竟其妻子。而亡者猶不息。操欲更重其刑。并及其父母兄弟。高柔啟曰。士卒亡軍。誠在可疾。然竊聞其中時有悔者。愚謂乃宜貸其妻子。以誘其還心。猥復重之。柔恐自今軍士見一人逃亡。誅將及己。亦且相隨而走。不可復殺也。此重刑非所以止亡。乃所以益走耳。操稱善久之。

李漢超在關南。民有訟其強娶己女為妾。及貸民錢不償者。宋太祖召謂曰。汝女可適何人。曰農家。漢超未至關南時。契丹何如。曰歲苦侵暴。今復爾耶。曰無也。上曰。漢超朕之貴臣。汝女為之妾。不猶愈於農婦乎。使漢超不在關南。汝家尚能保其所有貨財乎。責其人而遣之。密使諭漢超曰。亟還其女并所貸。朕姑賞汝。勿復為也。

朱雋少孤。母常販繒為業。雋以孝養名。好義輕財。時同郡周規辟公府。當行。假郡庫錢百萬。以為冠幘費。而後倉卒督責。規家貧無以備。雋乃竊母繒帛為規解對。母失產業。深患責之。雋曰。小損當大益。初貧後富。必然理也。

曹參為齊相。國治尚清淨。及參去。屬其後相曰。以齊獄市為寄。慎勿擾也。後相曰。治無大於此乎。參曰。不然。夫獄市者。所以并容也。今君擾之。姦人安所容乎。吾是以先之。相舍後園。近吏舍。吏舍日飲歌呼。從吏患之。無如何。乃請參遊後園。聞吏醉歌呼。從吏幸相國召按之。而反取酒張坐飲。大歌呼與相和。參見人之有細過。掩匿覆蓋之。府中無事。

蘇轍殿試策問。引漢昭變武帝法度事。哲宗震怒曰。安得以漢武比先帝。轍下殿侍

罪衆不敢仰視。范純仁從容言：武帝雄才大畧，史無貶辭。輒以比先帝，非謗也。陛下視事之始，進退大臣，不當如呵叱奴僕。哲宗曰：人謂秦皇、漢武，純仁曰：輒所論事與時也。非人也。哲宗為之少霽。輒平日與純仁多異，至是乃服。

卓茂為密令，有言部亭長受其米肉遺者。茂辟左右問之曰：亭長從汝求乎？抑汝有事囑之受乎？或汝自以恩意遺之也？人曰：吾遺之。茂曰：遺之更何言？人曰：竊聞賢聖之君，使人不畏吏，吏不取人。今我畏吏，是以往遺遺而受，故來言耳。茂曰：汝為敝民矣。鄰里長老歲時尚致餽遺，況吏與民哉？凡人之生，羣居雜處，故有禮義以相接。汝獨不欲修之，寧能高飛遠走，不在人間邪？亭長素善吏，歲時遺之禮也。人曰：既如此，律何故禁？茂曰：律設大法，禮順人情。今我以禮教汝，汝必無怨惡，以律治汝，汝將何所措其手足乎？一門之內，小者可論，大者可殺也。且歸念之。

范仲淹每患諸路監司不才，取班簿視不才，監司皆一筆勾之。富弼謂仲淹曰：六丈則是一筆馬知一家哭矣。

薛宣為太守，及日至休吏，賊曹掾張扶獨不肯休，坐曹治事。宣出教曰：蓋禮貴私，人道尚通。日至吏以令休，所繇來久。曹雖有公職事，家亦望私恩意。掾宜從衆歸對。

妻子設酒肴請鄰里一笑相樂扶慙愧官屬善之郡中清靜

唐桂州督李弘節沒後其家賣珠太宗聞之曰此人宰相言其清今既賣珠舉者豈得無罪魏徵曰在朝諸臣清貞不渝者屈突通張道源而已通子三人來選共坐一匹羸馬道源兒子至不能存立陛下皆未曾問及今弘節為國立功前後大蒙賞賚自不為貧妻子賣珠有何罪而責其舉者乎太宗撫掌曰造次不思遂有此語

宋真宗時日者上書言宮禁事坐誅籍其家得朝士所與往占吉凶之說帝怒欲付御史王旦曰此人常情且語不及朝廷不足罪因自取占問書進曰臣少賤時不免為此必以為罪願并臣付獄真宗曰事已發何可免旦曰臣執國法豈可自為之幸於不發而以罪人也帝意稍解旦乃悉焚所得書已而帝復悔馳取之已焚矣

黃霸治潁川務在成就全安長吏許丞老病聾督郵白欲逐之霸曰許丞廉吏雖老尚能拜起送迎即重聽何傷且善助之或問故霸曰數易長吏送故迎新之費甚多所易新吏又未必賢或不如其故凡治道去太甚者耳

宋時輦運卒有私質市者。上聞之曰。偉門如鼠穴。何可盡塞。但去其尤者可也。篙工楫師有少販鬻。但無妨公。不必究問。蒙正對曰。水至清則無魚。人至察則無徒。曹參不擾獄市者。以其能兼愛善惡也。若窮之則姦慝無所容。故告以慎勿擾耳。寇準在藩鎮。生辰造山棚大宴。排設如聖節儀。晚衣黃道服簪花。為人所奏。帝怒。謂王旦曰。寇準每事欲效朕。旦微笑。徐對曰。準許大年。紀尚駿邪。真宗意解曰。然。此正是駿爾。遂不問。

太祖行後苑。見巢鵲翼哺之勞。曰。禽鳥且爾。況人母子之恩乎。令羣臣有親老者。許歸養。

成祖時。廣東布政徐奇入覲。載嶺南藤簞。將以餽廷臣。邏者獲其單目以進。上視之。無楊士奇名。乃獨召之。問故。士奇曰。徐奇自都給事中受命赴廣時。衆皆作詩文送之。故有此餽。臣時有病。無所作。不然亦不免。今衆名雖具。受否未可知。且物甚微。當亦無他上意。解即以單目付中官。令燬之。

唐宣宗坐朝。次對官趨至。必待氣息平均。然後問事。有遠郡謝表。必躬覽之。左右曰。此不足煩聖慮。上曰。遠郡無非時章奏。只有此謝表。安知其不有情懇乎。吾不敢

忽也

牛奇章公帥維揚杜牧之在幕中夜多微服逸遊公聞之以街子數輩潛隨牧之以防不虞後牧之以拾遺召臨別公以縱逸為戒牧之始猶諱之公命取一篋來皆街子報帖云杜書記平善乃大感服

朱博守左馮翊大姓尚方禁盜人妻見斫府功曹受賄寢其事調禁守尉博聞知以他事召見視其面果有瘢辟左右問禁禁自知情服罪博笑曰丈夫固時有是卿欲洒耻能自效否禁且喜且懼對曰必死報博救禁毋得泄語有便宜輒記言因親信為耳目禁晨夜捕發盜賊及他伏奸博擢禁連守縣令久之召功曹責以禁等事與筆札使自記功曹惶怖具自疏奸大小不敢隱博知其對以實恕其罪使自改隨投刀使削所記遣出就職功曹俱感而畏之後不敢蹉跌博各成就其職宋明帝宮中大集羸婦人為歡明恭后獨以扇障面帝曰外舍家寒乞何獨不視后曰為樂之方自多豈有姑姊妹集聚而羸婦人形體以為樂哉后兄王景文曰后在家甚懦弱耳今遂能剛正如此

溫公為相每詢士大夫私計足否人怪而問之公曰儻衣食不足安肯為朝廷而輕

去就耶。

凡與人相處。當方便提撕。開其迷惑。譬猶長夜大夢。而令之一覺。譬猶久陷煩惱。而披之清涼。為惠最普。

蕭何為民請上林苑空地。高帝怒。謂受賈人財物。下廷尉繫之。王衛尉曰。陛下距楚數歲。陳稀黥布反時。相國守關中。不以為利。乃利賈人之金乎。上即日赦出。周勃免相。人上書告勃欲反。捕勃治之。薄太后謂文帝曰。絳侯綰皇帝璽。將兵於北軍。不以此時反。今居一小縣。顧欲反邪。帝即赦勃。噫。二臣之所值亦危矣。而衛尉與太后。以一言立釋其禍。所謂扶危昭枉者。非邪。

唐每歲上巳。許宮女於興慶宮大同殿前。與骨肉相見。縱其問訊。家眷更相贈遺。一日之內。人有千萬。有初到親戚便相見者。有及暮而呼喚。姓第不至者。涕泣而去。歲歲如此。

河間王次子晦。私第有樓。下臨酒肆。其人嘗候晦言曰。微賤之人。雖禮所不及。然家有長幼。不欲外人窺之。家迫明公之樓。出入非便。晦即日毀其樓。

光逸為博昌小吏。縣令使送客。歸途冒雨雪。舉體凍溼。還值令不在。逸解衣而烘。徑

入令被中卧。令還大怒。逸曰。家貧衣溼。無可代者。若不暫溫。勢必凍死。奈何。惜一被而殺一人乎。令奇而釋之。

景公問晏子曰。子近市。識貴賤乎。是時公繫於刑。有鬻踊者。晏子乘機對曰。臣實識之。過者踊貴而履賤。公愀然改容。於是省刑。

蘇峻亂。諸庾逃散。庾冰時為吳郡。單身奔亡。民吏皆去。唯郡卒獨以小船載冰出錢塘口。蓬篠覆之。時峻賞募覓冰。屬所在搜簡甚急。卒捨船市渚。因飲酒醉還。舞棹向船曰。何處覓庾吳郡。此中便是。冰大惶怖。然不敢動。監司見船小。裝狹。謂卒狂醉。都不復疑。自送過浙江。寄山陰魏家得免。

國朝尚書李慶言於上曰。今歲蓄馬頗蕃。除操用外。尚餘數十散民間。恐重散民。今朝覲官皆集。當各給一馬。令牧。其孳生准民間例。聽太僕考較。上從之。楊士奇力陳不可。曰。朝廷禮賢。奈何役之畜馬。以蘇民。上曰。慶幾誤朕。當即罷此令。既內批。兩日不出。越日召士奇。曰。內批未嘗忘之。初聞汝言。即遣人覘李慶輩交口忿爾。朕念爾孤立。故不欲因汝言而罷此令。今有名矣。出示一疏。乃廉使陳智言按察所以肅察貞度。今太僕得臨之。歲徵駒與下民等。憲網掃地矣。上曰。爾

就據此草執士奇叩頭曰陛下知臣臣不孤矣噫聖主之曲體人情至此

開元中頒賜邊軍纈衣製於宮中有兵士於短袍中得詩曰沙場征戍客寒苦若為眠戰袍經手作知落誰阿邊畜意多添線含情更著綿今生已過也重結後身緣兵士以詩白於帥帥進之玄宗命以詩遍示六官曰有作者勿隱吾不罪汝有一宮人自言萬死玄宗深憫之遂以嫁得詩人仍謂之曰我與汝結今身緣邊人皆感泣

鐵哥從英宗獵獵者射兔誤中名駝帝怒命誅之鐵哥曰殺人償畜刑太重帝曰誤耶史官必書亟釋之庾人有盜杭罪應死鐵哥曰臣鞠之其人母病盜以養母耳請貸其死上從之

張華為太守善易卦明於政刑罪人畏不敢犯或當死者悉放歸辭父母時有一人犯盜欲誅放歸辭別限滿赴州就刑在路號哭經趙朔家朔問故答曰某犯法當死蒙太守給假辭父母限滿就刑所以悲泣朔曰何不逃去答曰使君明於易筮前後逃者皆獲是以不敢違朔曰吾能免汝汝到行渡河可取竹筒盛水三尺安於腹上乃卧黃沙中經三日然後可還始終擒汝不得也其人一依朔言法司怪